

Gronda perdita tar l'Axpo

Ina rectificaziun da valor chaschuna rumpatesta al concern Axpo

DA MARTIN CABALZAR

■ **Il concern d'energia svizzer ha fatg l'onn da gestiun 2015/2016 ina perdita dad 1,25 milliardas francs. Quai è ina perdita da record. La raschun principala per quest record è ina rectificaziun da valor dad 1,6 milliardas sin l'Ovra idraulica da pumpadi Linth-Limmern.** Gia l'onn avant aveva quai dà in minus da 990 milliuns francs medemmain pervi da rectificaziuns.

Quest onn muntan las rectificaziuns e las reservas ch'ins ha fatg pertutgant contracts da furnir energia a total 1,6 milliardas. Radund ina milliarda francs ha la Axpo stuì admetter a las reservas per retrair energia, sco i resorta dal rapport da finanzas.

In nov contract cun ils acziunaris

La Axpo Holding ch'è en possess dals chantuns e da las ovras idraulicas chantunalas vul remplazzar il contract da fundaziun che date-scha da 1914. Plinavant duai il cussegl administrativ vegnir depolitisà ed il dumber dals commembers dal cussegl administrativ vegnir reduci. Ina gronda part da las stipulaziuns fixadas en in contract da fundaziun na correspundian betg pli a la realitad midada sin il martgà d'energia e consequentmain betg pli realisabel. Per quel motiv sajan las regenzas dals chantuns e las ovras idraulicas chantunalas vegnidas a la conclusiun da remplazzar il contract da fundaziun vertent

tras in contract da colliaziun che correspunda al temp dad oz cun ils acziunaris.

Ovra idraulica Limmern perda massiv valita

Las amortisaziuns, deducziuns e reducziuns da valita sin las ovras idraulicas e la rait muntan a 558 milliuns. Ina gronda part da questa perdita è d'attribuir al nov implant da pumpadi Limmern. Mez settember ha la Axpo communitgà ch'ella stoppia sbassar la valita da quest implant per 540 milliuns francs.

Abstrahà da quai n'èsi betg reussi al concern da meglierar da radent la situaziun finanziala da l'interpresa. Bain ha la Axpo pudì augmentar la quantitat da l'energia vendida sin 84,9 uras terawatt. La prestaziun totala per la fin da settember current è sa reducida per 7,6 pertschient sin 5,4 milliuns francs. Tenor l'Axpo saja quella reducziun d'attribuir essenzialmain als bass pretschs d'energia che sajan actualmain sin nivel fitg bass.

Terz onn da deficit

Il resultat da manaschi da 637 milliuns avant amortisaziuns ed effects spezial taxescha il concern per acceptabel cunzunt er en vista a las nauschas cundiziuns dal martgà. Dentant era quella valita è pli bassa ch'il deficit dad 834 milliuns.

Cun in minus dad 1,25 milliardas cuntinua l'Axpo era quest onn cun la seria da deficits. Cun 990 milliuns en l'onn 2014/15 e

cun 730 milliuns 2013/14 eran quels dentant in bun tant pli bass che antruras.

Nagina vendita d'ovras idraulicas

Plinavant ha il concern d'energia communitgà ch'el saja a la tschertga da novs investurs. Sin la vendita dad ovras existentas vegn dentant, cuntrari als plans oriunds, renunzià. Ils novs investurs duain sa participar a las unitads d'interpresa creadas da nov. Quellas vegnan a cumpletter las domenas actualas: energias regenerablas, clientella internaziunala, raits e vendita d'asset.

Davart la dimensiun da las transacziuns previdas na fa l'Axpo naginas indicaziuns. La planisaziun da la nova partiziun cun il titel «Axpo Solutions» duai cuzzar dus onns, sco quai che Axpo communitgescha. La via sin il martgà da chapital è previda per 2019.

Persunas dal rom enstagi cusseglers governativs

Ina midada radicala datti er en il cussegl administrativ. Quel na duai betg pli vegnir occupà cun represchentants da las ovras chantunalas ed era betg da politichers, ha il president dal cussegl administrativ *Thomas Sieber* ditg ier a Turitg. Cun questa mesira veglian ins evitar conflicts d'interess, damai che las ovras chantunalas sajan savens concurrentas da l'Axpo sin il martgà. Il dumber dal cussegl administrativ duai vegnir reduci da 13 sin nov commembers.



L'Ovra electrica Linth-Limmern è sco i para il motiv per las grondas ratificaziuns da valita tar l'Axpo.